



SAKSPAPIR

Saksnr	Utval	Type	Dato
62/2018	Kommunestyret	PS	01.10.2018

Sakshandsamar	Arkiv	ArkivsakID
Sølvi Legård	FE - 033, TI - &29	18/1234

INTERPELLASJON FRÅ HEGE EIDE VIK - SKAL VAKSDAL KOMMUNE SØKJE OM Å BLI EIN SYNGJANDE KOMMUNE GJENNOM KRAFTTAK FOR SONG?

Frå Hege Eide Vik, SP, ligg det føre slik interpellasjon:

Skal Vaksdal kommune søkje om å bli ein Syngjande Kommune gjennom Krafttak for Song?

Song er viktig frå vogge til grav, frå fosteret kjenner vibrasjonane frå stemmene utanfor til dei trygge tonane av ein kjend song ved slutten av livet.

Å syngje saman kan redusere nivået av stresshormon i kroppen og stimulere produksjon av lukkehormon.

Songstemma er instrumentet me alle ber med oss, og som me alle kan bruke. Dess meir me brukar den, dess betre blir den. Trening av songstemma kan altså samanliknast med anna trening.

1. november er det søknadsfrist for å bli Syngjande Kommune frå 2019. Prosjektet går over 3 år, og er i regi av Krafttak for Song. Krafttak for song er støtta av Kulturdepartementet, og har tverrpolitisk støtte for sitt arbeid med å styrke songtradisjonar og songglede over heile landet. Målet med prosjektet Syngjande kommune er at kommunen gjennom rettleiing frå fagpersonar skal kunne opprette nye varige songtiltak iløpet av prosjektperioden. Framdriftsplan er skissert i informasjonsmateriell som de finn lenke til nedst i teksten.

I Vaksdal kommune har me allereie mange gode songtiltak. Me har fleire aktive kor for ulike målgrupper. Me har AO-bandet med tilrettelagt undervisning. Me har fleire barnekor og baby- og småbarnssong i regi av kyrkja. Den kulturelle Spaserstokken vert administrert lokalt, og fleire av desse konsertane har som mål å fremje allsong. Ein av kulturskulen sine lærarar er innom eldreinstitusjonane ein gong i veka for å ha songstund. I tillegg har me eit aktivt musikkliv også når det gjeld korps og band for vaksne og born. Alt ligg til rette for at me kan utvikla oss vidare og ta songen (og musikken) til neste nivå.

Song på arbeidsplassane skaper gode relasjonar. Kva med å starta møtet med ein allsong? Song i barnehagen (i lyst leie) er ein nøkkel til språkutvikling og relasjonsbygging. Song i skulen har same effekt. Song på institusjonane våre kan vera inngangsport til minna hjå demente. Versa sit som spikra når alt anna er gløymt. Meir song i kvardagen kan skapa dei gode relasjonane, og positive augneblikk med ro og harmoni hjå nokon med uro og angst. Song kan opna for inkludering, kulturutveksling og felles forståing. Av lokal inspirasjon kan ein her nemna Voss sitt flotte integreringsprosjekt med utgangspunkt i voggесongar, ein variant av bergensk «Fargespill».

Vaksdal er ein langstrakt kommune. Kan me skapa samhald med å lage eit felles kjernerepertoar og syngje dei same songane? Ja, det er eg overtydd om! Me har fleire store og små lokale arrangement der me kan fremje allsong, Vintertreff, Fiskefestival, Eksingedalsmarknad, Daledagar med mykje meir.

Ein søknad om å bli syngjande kommune er godt forankra i det frivillige musikklivet. Vaksdal Musikkråd har slik uttale i sin handlingsplan for 2018:

«KONKRETE TILTAK

Felles tiltak for musikk og kultur vert gjennomført av eller i samarbeid med VMR.

Aktivitetar:

Arbeide for at Vaksdal kommune blir ein syngjande kommune "Krafttak for song».

Rektor Sindre Sortland i Vaksdal Kulturskule gir slik uttale: «Kulturskulen ynskjer at kommunen deltar i prosjektet og vil stille seg bak ein søknad. Song er grunnleggande for musikalsk opplæring og utvikling. Eit breiddeprogram for song i Vaksdal Kommune vil vera positivt for generell kulturforståing, og dermed positivt for Kulturskulen. Om Vaksdal blir syngjande kommune vil kulturskulen flette saman aktivitetar i prosjektet med sesongplanen. Kulturskulen vil og omdisponere ressursar der det er mogeleg for å støtte opp om prosjektet.»

Kommunen får kompetanse og kurs og ei viss økonomisk støtte til prosjektet. Kommunen sine egne kostnader er avhengige av kor mykje ein vil gjera ut av det. Dersom me brukar lokale krefter og det me har av ressursar i kommunen vår er det mogleg å halda utgiftene på eit lågt nivå.

Her har me sjansen til å gje innbyggjarane våre ei positiv og god gåve med ønskje om å skapa endå betre samhald mellom bygdene våre.

Utfyllande informasjon om tiltaket:

<http://www.krafttakforsang.no/>

<http://www.krafttakforsang.no/syngende-kommuner-3/>

Spørsmål til ordføraren:

Skal Vaksdal kommune søkje om å bli ein syngjande kommune gjennom Krafttak for Song?

Forslag til vedtak:

Vaksdal kommune skal søkje om å bli Syngjande kommune frå 2019. Søknaden vert administrert og sendt av Kulturskulen. Kommunestyret vert orientert i møte 10. desember om utfallet av søknaden.

Kommunestyret - Sak 62/2018

KOM - Behandling:

Interpellanten fekk ordet først for å fremja interpellasjonen.

Ordføraren gav slik svar:

Denne interpellasjonen støttar ordføraren, og vil rå til at kommunestyret sluttar seg til framlegg til vedtak.

Rektor i kulturskulen meiner at song inngår i alle former for kultur, Prosjektet her passar godt inn i gjeldande kulturplan og bygger opp om musikkmiljøet i Vaksdal kommune.

Utgiftene til å følgja opp prosjektet «Syngande kommune» initiert av «Krafttak for song» er ikkje uoverkommelege. Utgifter til å henta inn profesjonelle aktørar som en del av prosjektet bør innarbeidast i budsjettet. Det kan og søkjast eksterne midlar til prosjektet.

Det vart det politisk korrekte.

Her kjem det personlege svaret:

Syng - syng - syng - og vær glad.
syng med den stemme du har
syng - syng - syng og vær glad
syng og hold sorgen for nar
selv om du også på pumperne kø'r
frem med det gode humør
hvor du i verden du end kommer hen
så skal du syng - min ven.

Det vart så opna for debatt.

Det vart røysta over framlegget som låg i interpellasjonen - dette vart samrøystes vedteke.

KOM - Vedtak:

Vaksdal kommune skal søkje om å bli Syngjande kommune frå 2019. Søknaden vert administrert og sendt av Kulturskulen. Kommunestyret vert orientert i møte 10. desember om utfallet av søknaden.